

आकाशवाणी

खास-खास खबरां:-

1. केन्द्र नै केन्द्रीय बजट 2025-26 दी घोषणा दी अमलावरी लेई त्रै बरे आहली सार्वजनिक निजी हिस्सेदारी भविष्य परियोजना तयार कीती ऐ।
2. सुप्रीम कोर्ट नै हवा दी गुणवत्ता दे प्रबंधन आयोग गी 2 हफ्ते दे अंदर ओकड़े सब्बन स्रोतों दी पंछान करने लेई आखेया ऐ जेहड़े प्रदूषण दे मुख कारक न।
3. राष्ट्रीय मैडिकल आयोग दे मैडिकल आकलन ते दर्जेबंदी सरबन्धी बोर्ड MARB नै श्री माता वैष्णो देवी इस्टीच्यूट ऑफ मैडिकल एक्सीलेंट गी दिती गेदी इजाजत आहली चिट्ठी परताई लैती ऐ।
4. वेनेजुएला च अमरीकी सेना अभियान च 24 वेनेजुएलाई सुरक्षा अधिकारी ते 32 क्यूबाई सैन्य ते पुलस अधिकारी मारे गे न।
5. खेड मंत्री मनसुख मांडविया होरें आखेया जे Indian Super League दे मुकाबले 14 फरवरी थवां शुरु होग।

<><><><><><>

Finance PPP Pipeline

खजाना मंत्रालय दे आर्थिक कम्मकाज सरबन्धी मैहकमे नै केन्द्रीय बजट 2025-26 दी घोषणा दी अमलावरी लेई त्रै बरे आहली सार्वजनिक निजी हिस्सेदारी भविष्य परियोजना तयार कीती ऐ। खजाना मंत्रालय नै दस्सेया ऐ जे इसदे च केन्द्रीय ढांचागत मंत्रालय ते राज्य ते केन्द्र शासित प्रदेशों दी 17 लख करोड़

रपे थ्वां मती रकम दी 852 परियोजना शामिल न। मंत्रालय नै आखेया ऐ जे पाईप लाईन परियोजना शुरूआती जानकारी प्रदान करदी ऐ- जेदे कन्नै निवेशकें ते होरनें सरबन्धी धड़ें गी बेहतर योजना ते निवेश सरबन्धी फैसलें लैने च मदद थहोग।

<><><><><><>

SC-CAQM

सर्वोच्च अदालतै ब्हाऊ दी गुणवत्ता दे प्रबंधन आयोग गी दंऊ हफ्तें दे अंदर ओकड़े सब्बनें स्रोतें दी पंछान करने लेई आखेया ऐ- जेहड़े प्रदूषण दे मुख कारक न। प्रधान न्यासधीश सूर्यकांत ते न्यासमूर्ति जयमाल्या बागची होरें आखेया ऐ जे आयोग-सब्बनें माहिरें दे कन्नै चर्चा करियै लम्मी अवधि आले हल दा सुझास देऐ- जिसी चरणबद्ध ढंगै नै लागू कीता जाई सकै। अदालतै आखेया ऐ जे एह सुझास ऐसे होने चाहिदे न- जिंदे नै लोकें दी रोजी-रुट्टी-उद्योग ते जनता पर माड़ा असर नैई पवै। अदालतै इब्बी आखेया जे प्रदूषण नियंत्रण दे उपास इस करियै नाकाम रेह- कीजे अदालतै कैई सारे माहिरें दे बचार लैते जेहड़े बकखरें-बकखरें चाल्ली दे हे।

<><><><><><>

EAM –Luxemberg

विदेश मंत्री डाक्टर एस. जयशंकर होरें आखेया ऐ जे पच्छमी यूरोपीय मुख्य लक्ज़मबर्ग- भारत दा इक महत्वपूर्ण सांझेदार ऐ ते दौनें मुख्यै बशकार फिनटेक- अंतरिक्ष ते होरनें क्षेत्रें च सहयोग बड़ा मता बदी सकदा ऐ। डाक्टर जयशंकर

फ्रांस ते लक्ज़मबर्ग दी 6 दिन दी यात्रा तैहत इसलै लक्ज़मबर्ग च न। उनें लक्ज़मबर्ग दे प्रधानमंत्री ल्यूक फ्रीडेन ते उप-प्रधानमंत्री सह-विदेशमंत्री जेवियर बेटेल कन्नै मलाटी कीती। डाक्टर जयशंकर होरें आखेया जे दपक्खी सांझेदारी दे इलावा यूरोपीय संघ दे कन्नै भारत दे सरबंधें गी मज़बूत करने च बी लक्ज़मबर्ग दी भूमिका महत्वपूर्ण रेई ऐ। डाक्टर जयशंकर होरें लक्ज़मबर्ग दे नेताएं कन्नै माली- निवेश- तकनॉलोजी- नमियां काहड्डा- डिजिटल सेवा ते प्रतिभा उपयोग दे क्षेत्र च सहयोग बढ़ाने पर चर्चा कीती। उनें राष्ट्रपति द्रौपदी मुरमू ते प्रधानमंत्री नरेन्द्र मोदी हंदिआं शुभकामनां ते सनेहा बी दिता।

<><><><><><>

US –Greenland Takeover

अमरीका च राष्ट्रपति हुंदे दफ्तरै आखेया ऐ जे राष्ट्रपति डोनाल्ड ट्रम्प होरें दक्खन अमरीका मुख्य- वेनेजुएला च सैन्य कारवाई मगरा ग्रीनलैंड पर कब्जे आस्तै सैन्य ताकत दे इस्तेमाल सनें होरनें विकल्पें पर चर्चा कीती ऐ। ट्रम्प होरें इक बार फही आखेया जे अमरीका दी सुरक्षा आस्तै ग्रीनलैंड जरूरी ऐ- जेड़ा डेनमार्क दा इक स्वायत्त क्षेत्र ऐ। इस दौरान डेनमार्क दे प्रधानमंत्री मेटे फ्रेड्रिक्सन होरें आग्रह कीता ऐ जे अमरीकी हमले कन्नै उत्तर अटलांटिक संधि संगठन यानि नाटो खत्म होई जाग। केई यूरोपीय मुखें बी डेनमार्क दा समर्थन कीता ऐ। हाल च गै अमरीका नै इक सैन्य कारवाई च वेनेजुएला दे राष्ट्रपति निकोलस मादुरो गी फगड़ी लैता ऐ।

<><><><><><>

Venezuela Killing

वेनेजुएला दी सेना नै शनिवारे आखेया जे अमरीकी सैन्य अभियान च 24 वेनेजुएलाई सुरक्षा अधिकारी मारे गे- जेदे कन्नै मरने आहलें दी गिनतरी बढियै 56 होई गई ऐ। वेनेजुएला दे अटॉर्नी जनरल तारेक विलियम साब होरें आखेया जे दर्जना भर अधिकारी ते नागरिक मारे गे न। उन्नै इसी युद्ध अपराध दस्सदे होई आखेया जे अभियोजन इन्नै मौतें दी जांच करोग। मरने आहलें दी गिनतरी क्यूबा सरकार दी ऐतवारें दी घोषणा दे इलावा ऐ जेदे च उन्नै आखेया हा जे वेनेजुएला च कम्म करा रदे 32 क्यूबाई अमरीकी अभियान च मार गे- जेदे करी कैरेबियन दवीप च 2 दिन दा सौग मनाया गया।

<><><><><><>

ASI Online Tickets

हुंन केन्द्र सरकार आसेया संरक्षित 170 थवां मती स्मारकें ते संग्राहलयें आस्तै ऑनलाईन टिकट खरीदी जाई सकोग। भारतीय पुरातत्व सर्वेक्षण नै इसदे आस्तै ओपन नैटवर्क फॉर डिजिटल कॉमर्स दी शुरुआत कीती ऐ। संस्कृति मंत्रालय नै आखेया जे ऑनलाईन टिकट प्रणाली कन्नै लम्मी कतारें सोया निजात थहोग। ऑनलाईन टिकट च बी भारतीय आस्तै 5 रपे ते विदेशी नागरिकें आस्तै 50 रपें दी छुट जारी रहोग।

<><><><><><>

Mandaviya -ISL

खेड्ड मंत्री मनसुख मांडविया होरें आखेया जे इंडियन सुपर लीग मुकाबले 14 फरवरी थवां शुरु होगन। प्रतियोगिता च 14 टीमां हिस्सा लै रदियां न। इंदे च मोहन बागन ते पूर्वी बंगाल दी टीम बी शामिल ऐ- जेड़ा अखिल भारतीय फुटबॉल महासंघ दे माली प्रारूप दा विरोध कार रदी ही। लीग च कुल 91 मैच खेड्डे जागन। अखिल भारतीय फुटबॉल महासंघ दे अध्यक्ष कल्याण चौबे होरें आखेया जे सैकेंड डिवीजन आई लीग प्रतियोगिता बी लगभग उसलै परतियै शुरु होग जिसदे च 11 टीमा 55 मैच खेड्डगन।

<><><><><><>

J&K U-16 Cricket

जम्मू-कश्मीर दे 16एं बरे शा हेठली उम्री दे खडारियें दी अंडर-16 क्रिकेट टीम ने सूरत- गुजरात च खेड्डे गेदे फाईनल च मिज़ोरम गी इक पारी ते 182 रन्जें कन्नै हराइयै Vijay Merchant Trophy Plate Group Title दा खिताब जिती लैता ऐ। मिज़ोरम दी टीम ने अपनी पैहली पारी च छडे 100 रन्ज बनाए हे- जेहदे परते च जम्मू-कश्मीर दी टीमै 400 रन्ज बनांदे होई 300 रन्जें दी बढ़त हासल करी लैती ही। नेहा पैहली बारी ऐ जिसलै जम्मू-कश्मीर नै BCCI दा कोई बड्डा खिताब अपने नांs कीता ऐ। मुखमंत्री उमर अब्दुल्ला होरें इस उपलब्धि लेई टीम गी मुबारकबाद दिंदे होई इसी इक ऐतिहासिक जित ते जम्मू-कश्मीर च लगातार बेहतर हुंदे क्रिकेट कौशल दी झलक करार दिता ऐ।

<><><><><><>

IMD Weather

मौसम विभाग नै अज्ज दिल्ली-हरियाणा- चंडीगढ़- पंजाब-उत्तर-प्रदेश ते पूर्वी राजस्थान च घने कोहरे दा ऑरेंज अलर्ट जारी कीता ऐ। जम्मू-कश्मीर- लद्दाख- हिमाचल-प्रदेश- पच्छिमी राजस्थान-उत्तराखंड-बिहार- पच्छिम बंगाल- मध्य-प्रदेश ते देश दे उत्तर पूर्वी हिस्सें च बी घने कोहरे दे छाए रोहने दा अनुमान ऐ। छत्तीसगढ़- झारखंड- ओड़िसा ते विदर्भ च किश थाहरें अज्ज सीत लैहर दी बी संभावना ऐ। अगले 2 दिने च दिल्ली-पंजाब- हरियाणा ते चंडीगढ़ च घट्टो-घट्ट तापमान च 2 सवां 3 डिग्री सैलसियस दी गिरावट होई सकदी ऐ। कश्मीर दिएं किश उच्चिएं थाहें पर हल्की बर्फबारी होई ऐ जेदे कन्नै राती दा तापमान घट्ट होआ ऐ ते खिते च सीत आहली स्थिति परतिए बनी गई ऐ। मौसम विभाग ने उत्तरी ते मध्य कश्मीर दिएं किश उच्चिएं थाहरें पर अज्ज हल्की बर्फबारी होने दे असार जताए न। विभाग दा आखना ऐ जे घट्टोघट्ट तापमान च गिरावट औग ते जम्मू दे मैदानी इलाकें च धुंध छाई सकदी ऐ जेदे करी दूर तगर दिक्खने च औख होई सकदी ऐ। 7 जनवरी थमां 15 जनवरी तगर गासै पर आशिकं तौर पर बदल छाए दे रौहडन।

<><><><><><>